



21. oktoberi 2016

UKA2016/37

Sulisartut sunniuteqaqataaffiginngisaannik suliffeqarfiit aaqqiissutaagallartumik sivikitsumillu sulinermik unitsitsigallarnerini sulisartut suliffeqarfimminniit angerlartitaagallartarnerat pillugu aalajangersakkat Nunatsinni suliffeqarfinnut tamanut tunngatitaalernissaat qulakkeerniarlugu suliffeerunnermi ikiorsiissutit pillugit inatsisartut inatsisaata nr. 2, 15. maj 2014-imeersumi § 4-ap allannguutissaanik Naalakkersuisut kingusinnerpaamik UPA2017-imi Inatsisartunut saqqummiusseqqullugit Inatsisartut aalajangiiffigisassaattut siunnersuut. Ilanngullugu siunnersuutigineqarpoq inatsisini allani attuumasuni oqaasertatigut naqqiisoqassasoq, qulakkeerniarlugu Suliffeqarfiit aaqqiissutaagallartumik sivikitsumillu sulinermik unitsitsigallarnerini sulisartut suliffeqarfimminniit angerlartitaagallartarnerat suliffeqarfinnut tamanut atuuttussanngortillugu.

(Inatsisartunut ilaasortaq Suka K. Frederiksen, Siumut)

Inatsisartunut ilaasortaq Suka K. Frederiksen, Siumut siunnersuuteqarpoq aalajangiiffigisassatut siunnersuuteqarluni tassalu sulisartut sulinerminni suliffeqarfiup unititsigallarneranni tassalu angerlartitaagallartarnerannut tunngasumik tamanna oqaaseqarfigissavarput.

Sulinermik inuussutissarsiuteqartut sulisartut tassalu SIK-mut ilaasortat atugaat ullutsinnut inuuniarnermi atugaat isigigaanni tupinnaannartumik inuuniarnermikkut artorsarput, tupinnaqaarlu sulinermik inuussutissarsiuteqartut kattuffiat SIK taamak nipaarsaartigalutik pimmeta, allaammi sulisartut ilaqutariinni pilersuiniarnermikkut artornartorujussuarmik inuuniarsaralutik inuummata.

Akissarsiat appasinnerujussuat ullutsinnut inuuniarnikkut atukkatsinnut naapertuutinnigtsorujussuarmik SIK-mut ilaasortat aningaasarsisinneqartarput tassalu oqarluannaaraanni inuuniarnermut angummanissamut amigaartorujussuarnik inuuniutissaminnik aningaasarsiaqartinneqartut.

Ilaqutariit meerartallit sulinermik inuussutissarsiutillit tunngavigalugit akissarsiallit atugaat ajorluinnarput, taamaattumik aamma suliffiit nunamiittut suliffeerunnermi ikiorsiissutinik tamarmik pisinnaanissaat qulakkeertariaqarparput, imaassanngilarmi taamaallaat aalisakkerinermi suliallit, angerlarallartitaanerminni ikiorserneqartassasut.

Nersortarpagut sulinermik inuussutissarsiuteqartut suleruloornerminni aningaasarsiannguatik annertugisassaangilluinnartut tamangajalluinnaasa ineqarnerminnut akiliutigisarmatigik pissutsit tamakku ataatsimoorluta aaqqinniartariaqarpagut sulinerminnut naleqquttumik akilerneqartarnissaat inussutissaqarnissaallu qulakkeerniartariaqarmat.

Fabrikkini sulisartut amigaatigineqarput ilaatigullu eqiasuttutut nalilersorneqartarput, naamik suliaannut naapertuutumik akilersorneqannginnamik, taamaattumik sulineq aalisakkerivinni akissarsiat tungaasigut pitsaanerulluinnartariaqarpoq.

Taamatut oqaseqarluta Suka K. Frederiksen Siumut siunnersuutaa tamakkiisumik taperserlugu ataatsimiititaliami suliarineqarnissaa innersuussutigaarput.

Hans Enoksen